

Regional News Unit AIR Aizawl  
Tuesday, September 10, 2024  
Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Mizoram Legislative Assembly-a 'Committee on Papers Laid on the Table' chuan Speaker Pu Lalbiakzama hnenah Commerce & Industries Department chungchanga hma an lakna report an thehlut.
- Home Minister Pu K. Sapdanga hovin hunpui lo thleng tura dan leh thupek kenkawh dan tur chungchang rel a ni.
- India leh UAE te chuan nimin khan inremna thuthlung Memorandum of Understanding panga an ziak.
- Typhoon Yagi avangin Vietnam-ah mi 59 an thi tawh a, mi 247 chin hriatlohin an bo.



### ASSEMBLY

Mizoram Legislative Assembly-a 'Committee on Papers Laid on the Table' chuan Speaker Pu Lalbiakzama hnenah Commerce & Industries Department chungchanga hma an lakna report an thehlut a,

Rules of Procedure and Conduct of Business hnuai Rule 229 behchhanin 'First Report on Actions taken by the Government against the recommendations contained in the Seventh Report of Committee on Papers Laid on the Table, Relating to Commerce & Industries Department' tih a ni.

Committee on Papers Laid on the Table hian House-a Dan pawm tawh, rules siam ngai, la siam si lohte a en zui a, siam a nih ngei theih nan hma a lakpui thin a. Committee on Papers Laid on the Table ah hian Lt. Col. Clement Lalhmingthanga chu Chairman niin, member panga an awm mek a ni.



### MIZORAM VEHICLE DATA

Mizoram Transport Department tarlan danin, kumin August thla tawp thlengin Mizoram chungah lirthei 3,15,831 register a ni tawh.

Lirthei register zingah hian lirthei ke hnih nei, two wheeler chu register tam ber a ni a, tun dinhmunah Mizoram pumah two wheeler 2,16,141 register tawh niin hemi dawl-ah hian mimal motor LMV 52,761 register a ni tawh bawk.

Transport Department-in a a tarlan danin, tun dinhmunah Two Wheeler Taxi Mizoram pumah 4133 a awm mek a, passenger phur motor-te ke li nei 5873 awm mekin passenger phur motor tho ke thum nei chi 6341 Mizoram pumah register tawh a ni bawk a, heng bakah hian sumdawna atana hman, motor lian bungraw phur chi 22,676 register tawh a nih bakah Car rental a tlan lirthei 356 a awm mek bawk.

Transport Department-in thla hmasa August ni 31 thlenga Mizoram a motor register tawh a chhinchhiahna-ah hian Mizoram chhungah Bus 565 awm mekin Ambulance 243 register a ni tawh bawk a, lei laihna lirthei, Excavator pawh a vaiin 1193 register a ni tawh bawk.

Transport Department chhinchhiah danin Mizoram chhunga lithei pung chak ber chu lirthei ke hnih nei, two wheeler niin kumin sorkar kumthar ni atanga thla hmasa August ni 31 thleng khan Mizoram chhunga two wheeler register thar zat chuan 5049 a tling tawh a, hemi chhung vek hian LMV register zat pawh 378 a nih thu tarlan a ni bawk.

<><><>

## HOME MINISTER

Home Minister Pu K. Sapdanga hovin hunpui lo thleng tura dan leh thupek kenkawh dan tur chungchang leh, halpuah leh halmawi hrang hrangte khap dan tur chungchang MINECO-ah nimin khan rel a ni.

Home Minister chuan hriselna kawnga nghawng tha lo tak thlentu halpuah leh halmawi hrang hrang ven leh hemi ti lo tura mipui zirtir kawngah tanrual a pawimawh thu sawiin, hemi chungchang sawihona hun kum dang zawng aia hmaa neih a ni chu lawmawm a tih thu leh rah tha a chhuah ngei a beisei thu a sawi a. Dan bawhchhiate laka hremna lekkawh zel chu halpuah leh halmawi hal dona kawnga inzirtirna pawimawh tak a nih thu sawiin, kalkhawmte chu halpuah leh halmawi khap chungchanga ngaihndan leh rawtna an neihte inthlahrung hauh lova thlen turin a sawm a ni.

Chief Secretary Dr. Renu Sharma chuan hmun dangte ngaihtuahin Mizoram boruak chu la thianghlim zawk hle mah se vawngchim zel tura tanlak angai a, nakin zel atan boruak bawlhhlawh zel tur kan ven lawk a ngai a ni, a ti a. A hun taka chetlak a tul thu leh inzirtirna zau zawka kalpui a tul thu sawiin, Sawrkar mai nilo, kan zavaia tanrual a tul dawn thu a sawi bawk.

He hunah hian kum hmasa lama hmalak dante thlirlet a ni a. Tarlan a nih dan chuan nikum hunpui vuakvetah khan halpuah leh halmawi kaihhnawihah Police-in case 5 ziaklutin mi 9 an man a, an zinga 7 te hi thiam loh chantir an ni tawh a ni. Boruak bawlhhlawh leh bawlhhlawh loh tehna Air Quality Index (AQI) chuan halpuah leh halmawi hal vanglaiin a tehnaah 300 a hawlh kai a ni.

Home Minister hova thutkhawmah hian hunpui vuakveta dan leh thupek kenkawh chungchangah khauh lehzuala Sawrkar a kal dawn thu tarlan niin, halpuah leh halmawi lam chi reng rengte pawh khauh zawka khap nise tih a ni a. Mipuite hnena inzirtirna zau zawka kalpui dan turte ruahman niin, halpuah zuar leh halte report zung zungna tur siam leh nise tih a ni a. District tin Magistrate-te chu halpuah leh halmawi lam chi reng rengte khapna thupek chhuah tura hriattir nise tih a ni a. Veng leh khaw tinah tlangau hmangin ngenna siam nise, kohhran tawiawmna ngen ni bawk se, media platform hrang hrangte tangkai taka hman nise tih a ni a. State pawn atanga halpuah lakluh thin tihtawp a nih theih nana khauh lehzuala hmalak dan turte sawiho a ni.

<><><>

## ASSEMBLY SPEAKER :

Mizoram Legislative Assembly Deputy Speaker, Kolasib Bialtu MLA Pu Lalfamkima chuan Kolasib Venglai East a Urban Health & Wellness Centre Building sakna tur hmunhma chu nimin khan a enfiah.

Urban Health & Wellness Centre building sak tur hmunhma enfiahna ah hian Deputy Speaker Pu Lalfamkima chuan thusawiin, Sawrkar lam atanga Kolasib Venglai East-a Urban Health & Wellness Centre dah tumna a awm thu leh, Centre sak tur chu khawtlang mipui ten hriselna kawng a tangkai taka an hman ngei a duh thu sawiin, a hmun hma tifel tura hmalakna chak taka a kal chu lawmawm a tih thu a sawi a. Health & Wellness Centre chu mipui mamawh a nih angin khawtlang mipui ten chhawr tangkai ngei se a duh thu leh Centre an neih theih chhan pawh Khawtlang mipuite inlungualna rah chhuah a nih thu a sawi bawk a ni.

Kolasib District Urban Health & Wellness Centre hi tun dinhmunah mimal in luah a kalpui mek a ni a, he Centre-ah hian thawktu, Medical Officer Pakhat, Health Worker pakhat leh Nurse pakhat theuh an awm mek a, Health Sub Centre anga function tir nghal a ni bawk a ni.

District Bawrsap Pu Robert C Lalmangaiha, Settlement Officer Pi Lalvenhimi leh Sr. Chief Medical Officer Dr RK Lpawh an tel a, a tul ang te lo bawhzui turin Khawtlang hruaitu Village Council (VC) leh Kolasib Chief Medical Officer bakah Revenue Department te ruat an ni.

<><><>

## POSHAN MAAH

Bilkhawthlir ICDS Project chuan Eklavya Model Residential School Bilkhawthlir-ah Anaemia Screening Week Poshan Maah-2024 pualin nimin khan Anaemia screening an nei a,

He hunah hian CDPO Pi Lalthlengkimi chuan, ICDS hnathawh tlangpui tarlangin, naupang leh nu raipuarte enkawl in, chaw tha chi hrang hrang an pe thin tih a sawi a. Anaemia chu thisen tlakchham natna ani thu sawiin, hmeichhe fleirawl leh nu nau pawmah a awm duh bik niin a sawi a. Chutiang thlenglo tura inven dan kawng hrang hrangte kan hriat ve a pawimawh a ni, a ti bawk. Khawsik ser ser, thla bi a thi nei tha lo, thaw hlei thei lo, lu hai, chauh ngawih ngawih, sam tla nasa, kutke hmawr vawt reng, lungphu mumal lo te hi thisen neih tlem vanga thleng thei a nih avangin Doctor te rawn vat thin tur a ni a ti..

CDPO chuan, Mizote hian vawi khata chaw leh thil dang ei teuh kan ching a, hei hi thil thalo tak a ni a, tiin, vawi khata ei teuh lovin ei zing zawk ila, thil chi khat ei teuh lovin thil chi hrang hrang ei thin hi hriselna atan a that thu a sawi a, Tui in tam a pawimawh tih a sawi bawk.

He hunah hian Pu Malsawmdawngliana, Circle Officer, Bilkhawthlir ICDS Project chuan thu a sawi bawk a, hemi hnu hian hmeichhe fleirawl 30 te Anaemia screening neih pui nghal ani a, Iron tablet an sem nghal bawk.

<><><>

## HNAHTHIAL

Hnahthial District Bawrsap Pi Rita Lalnunmawii Pachuau chuan a pisa ah Sub Hqrs YMA Hnahthial Vigilance Committee te nimin khan meeting neihpuiin Hnahthial chhim lam daia National Highway kawng tlahniam chungchang an sawiho.

DC chuan Hnahthial chhim lama National Highway kawng chhuat tlabal siam that chungchangah Sub Headquarters YMA Vigilance Committee ten theih tawp chhuah a venhim hna an thawk chu lawmawm a tih thu a sawi a.

NH kawng tla hniam chu Hnahthial district mai bakah chhim lam district pathum, Lunglei, Siaha leh Lawngtlai mipuite zin kawng pawimawh tak anih avangin tha taka an zawh reng theih nan theih tawp chhuah zel a tul tur thu a sawi a. Kawng chu a la ngheh loh mai bakah duh ang tawka siam that ala nih loh avangin LMV aia lian tlan theih turin hawn a nih dawn rih loh thu a sawi a. Sub Headquarters YMA Vigilance Committee member-te chu kawng a chhiat belh zel loh nan leh thuchhuah siam chu mipui ten an zawm ngei theih nan theihtawp chhuahpui chhunzawm turin a ngen bawk a ni. Hemi rual hian Hnahthial by pass kawng pawh DC office lam chuan a dinhmun an en thlithlai reng thu a sawi bawk.

He hunah hian Sub Headquarters YMA Vigilance Committee member-te pawhin Bawrhsap hnenah hian an duhdan te leh hma an lak dan tur tha zawk te thlenin Bawrhsap-in National Highway kawng chhe laia LMV chauh tlan tlang theih tura khauh taka hma a la chu lawmawm an tih thu an sawi a ni.

<><><>

PM

India leh UAE te chuan nimin khan inremna thuthlung Memorandum of Understanding panga an ziak. Heng zingah hian Barakah Nuclear Power Plant hmalakna leh thawhhona turah Emirates Nuclear Energy Company leh Nuclear Power Cooperation of India Limited ten an tel a. Abu Dhabi National Oil Company leh Indian Oil Corporation Limited ten LNG supply chungchangah inremna an ziak bawk a ni.

Nimin khan Prime Minister Narendra Modia chuan New Delhi-ah Abu Dhabi Crown Prince Sheikh Khaled bin Mohamed bin Zayed Al Nahyan a kawm a. Hruaitu pahnih hian India-UAE inkara thil pawimawh tak tak an sawi dun a, thawhdunna tur thil thar leh lian chho mekte an ngaihtuah bawk a ni.

Nimin chawhnu khan President Draupadi Murmu-i pawhin Abu Dhani Crown Prince hi Rastrapati Bhavan ah lengah a sawm a. Inkawmna hun tha tak an hmang dun a ni.

<><><>

TYPHOON YAGI

Typhoon Yagi avangin Vietnam-ah mi 59 an thi tawh a, mi 247 chin hriatlohin an bo. Vietnam thuneitute sawidanin Typhoon Yagi hi Vietnam hmarlamah an tuar nasa a. Nimin zinga Phu Tho province-a thir lei a chim avangin lirthei 10 leh bike pahnih Red River ah an tla a. Mi 13 chin hriatlohin an bo zui a ni. Typhoon avang hian Cao Bang province ah mi 21 an thi a, Lao Cai province ah mi 15 an thi bawk nia thudawn a ni a. Vietnam Ministry of Agriculture and Rural Development chuan buh chinna ram hectare nuai 1 sing 1 leng sang 3-a zau Typhoon hian a ti chhia a. Thlai dang chinna hectare 22,000 chuang a chhe bawk niin an sawi a. Typhoon Yagi hi tunhnai kum 30-a Vietnam-in thlipui a tawrh nat ber a ni a. China Sea-a thli tleh Category 5 tling pha chhinchhiah pali zingah a tel a. Kum 1954 a Pamela, 2014 a Rammasun leh @021-a Rai tleh te nen angkhata dah a ni.

<><><>